

*Library
1900*

LETTRE
D'VNE DAME
DE PARIS,

A son seruiteur, à S. Germain.

A PARIS,

M. DC. XLIX.

LETTRE

D'UNE DAME

DE PARIS

A son seigneur, à S. Germain.

A PARIS

M. DC. XLIX.



LETTRE

D'VNE DAME DE PARIS,

à son seruiteur, à Sainct Germain.

DE quoy t'entretiendray-ie par cette lettre, amant insensible, ou plustost ennemy inplacable, sera-ce de la fureur qui t'anime, ou bien de la douleur qui me tue? & qui des deux ayme-tu mieux voir sur ce papier triste, ou le torrent de mes iustes reproches, ou les marques funestes de celuy de mes larmes? choisis & vois lequel pourra mieux te plaire: ou plustost recois & souffre l'vn & l'autre: puis qu'aussi tu causes les deux à la fois. Cruel me donne-tu de la sorte les marques de cette belle flamme que tu m'as si souuent tesmoignée: qu'au premier coup de la fortune plus changeant & plus inconstant qu'elle, tu suis le party de nos ennemis & tu m'abandonnes. Encore si la cause estoit iuste que tu fauorises, ie souffrirois sans murmure les peines que ton absence me donne, & ie condamnerois pour te plaire iusques à mes pleurs & à mes soupirs. Mais ce qui de mes premieres douleurs me forme vn second supplice, c'est que tu trahis egaleement & ta raison & mon amour: & que ie te vois tout à la fois combattre contre ma passion & contre ta iustice. Que t'a fait ta patrie Citoyen infidelle, que tu suiues vn tyran qui la veut destruire, & que tu t'armes pour ses ennemis? & moy que t'ay-ie fait, amant impitoyable, que tu m'abandonnes sans cause, & que tu cherches à mourir loing de mes yeux? dois tu preferer à ton deuoir &

à ton amour, la faueur d'un monstre qu'on ne peut acquerir sans crime & qu'on ne peut plus conseruer sans danger. Je t'auois tousiours reconnu si vaillant & si sage, qui t'a rendu si fol & si furieux, est-ce que tu ne cognois point la lascheté qui te gouuerne, & qu'il n'est point de pris d'honneur au bout de la carriere où tu veux courir. Si tu peus ignorer l'indignité de ton noir dessein, quelle illusion a frappé ta veüe & quelle erreur aueugle ton esprit? Celuy pour qui si librement tu abandonnes vne vie à mon amour tousiours trop chere, est celuy qu'il faudroit combattre & contre qui tu deurois perir. Considete vn peu mieux les sept années de sa barbare tyrannie. Repasse dedans ta memoire les infames deportemens & les lasches actions de ce Ministre infidelle. Iette tes yeux par toute la France, & voys en combien de lieux elle saigne des coups inhumains que ce bourreau luy a donnez. Si tu veux bien cognoistre combien de playes ce cruel luy a faites, commence à la regarder depuis la moindre de ces Prouinces & de ses villes iusqu'à Paris, visite-la depuis le moindre de ces sujets iusques à son Monarque. Regarde ces laboureurs morts de faim, ses artisans prests à mourir tout de mesme. Ses bourgeois qui tombent en foiblesse par l'auidité de cette sansuë, qui vuide leurs veines. Voy par tout la Noblesse ou lasche ou persecutée. Regarde la Iustice ou corrompue ou tyrannisée, monte iusqu'aux Princes, traitez en esclaués par ce lasche satellite d'Espagne; passe iusqu'au Parlement, ce Senat de toute la terre le plus auguste & le plus magnanime, que sa rage a voulu destruire. Monte encore plus haut, & va iusqu'au Roy, dont la perfidie nous priue & que son insolence nous enleue. Cognois-tu ta patrie ainsi déchirée & si pitoyablement defigurée, par les malices & les trahisons de ce barbare. Non tu ne la cognois plus sans doute, & l'en prends bon augure pour la conseruation de ton honneur & de ta vertu, si tu la cognoissois, tu ne luy ferois pas la guerre. Ce n'est plus cette illustre Monarchie si vigoureuse, si belle & si bien vestuë, c'est vn Estat languissant, passe & triste, & depouillé de ses ainstemens magnifiques. Son corps qui reste pourtant tout entier encore, paroist à nos tristes yeux sec & maigre. Cet animal glouton a deuoré toute sa chair & toute sa graisse. Je ne m'estonne point si tu ne cognois plus la France, qui t'a donné la vie, puis qu'elle est desia quasi morte. Ces traits diuins qui formoient sa charmante beauté sont euanoüis, elle a perdu

ces douceurs & ces graces, qui marquoient sur son front victorieux cette majesté si attrayante, qui la rendoit si chérie & si respectée de toute la terre. Le detestable artifice de ce demon qui la veut perdre, a sçeu de la sorte la defigurer pour la faire haïr, il en a fait le barbare, il en a fait vn spectre, qu'on ne regarde plus sans horreur. C'est ce qui porte contre elle tant de courages, lesquels s'ils la pouuoient cognoistre, seroient tous pour elle. Ainsi la Reyne croit coniurer contre quelque ennemie la ruine qu'elle luy procure. Les Princes la prennent pour quelque Phantome, quand ils osent la combattre, & qu'ils s'efforcent de la detruire: & toy qui t'abandonne à vne erreur si fatale & si criminelle, tu penses de tes coups malheureux faire des efforts legitimes. Sors bien-tost d'vn auuglement si funeste & si pernicieux à ta gloire & à ta patrie. Si tu ne la peus plus recognoistre au visage, cognois la du moins à la voix, escoute le son pitoyable de ces iustes plaintes. C'est elle mesme, n'en doute point, contre qui tu tourne la pointe de tes armes. C'est elle mesme que tu vois indignement renuersée par terre. Celle qui auoit acoustumé de rire, de chanter & de se resiouir, la voila qui languit, qui pleure & qui soupire.

Tu ne la sçauois plus me cognoistre, cher amant, c'est le mesme ton de sa voix, si ce n'est qu'il est plus triste & plus deplorable. Mais quelque tristesse & quelque malheur qu'elle te decouure, c'est pourtant tousiours elle mesme. Ne te trompe donc plus & ne sois plus abusé par le sensible & le funeste obiet de ses larmes. Regarde-les couler sans erreur, mais ne les considere pas sans tendresse, aprends de ton deuoir ce que tu dois faire pour leur vengeance & ce qu'en leur discours muet elles te demandent. Je ne veux point icy te faire des leçons qui te feroient rougir si tu ne les sçauois toy mesme. Je ne veux point te dire que tu n'as rien que tu ne luy doies, iusques à la derniere goutte de ton sang, & le dernier soupir de ta vie.

Leue le bras à présent sans craindre de faillir, tu sçais bien sur qui doit tomber le foudre que ta main decoche. Tourne le visage par derriere, & cours d'où tu viens faire preuue de ta fidelité que tu as trahie, quelque danger qui dans ce genereux dessein te menasse, tu me rendras tousiours moins alarmée, quand tu combattras pour la bonne cause.

Quelles douleurs ne m'as tu point fait souffrir, cher ingrat, depuis que tu m'as abandonnée. Te t'ay veu tous les iours aux risques de mourir perfide à ta patrie & barbare à ton amante. Je craignois pour ta mort & ie n'osois souhaitter ta vie. Quand ie t'imaginois dans le combat, si ie ne pouuois pancher à ta deroute, ie ne pouuois non plus me refoudre à ta victoire, & dedans ces dures incertitudes mon esprit chancelant ne pouuoit autre chose que se plaindre de ta manie.

Encor à tout moment ie suis dans ces tristes allarmes; mon ame assaillie de deux costez differents, souffre des coups mortels, entre lesquels peu s'en faut, elle expire. Sçais-tu pas que mes deux freres, non plus que leur sœur, ne sçauroient abandonner la bonne cause. Je les vois à mes yeux prendre des armes que i'apprehende de voir reuenir rouges du sang qui t'anime; & quand ie les vois s'en aller, ie crains tout à la fois qu'ils retournent; & ne retournent pas. Leur generosité me donne de la ialousie. Et si i'auois le corps masle aussi bien comme le courage, mon país verroit dedans moy le mesme zele qu'il connoist en eux. Ils sont dignes du sang qui les a fait naistre, & du nom illustre qu'ils portent. Le Parlement n'a point de bras plus prompts & plus vigoureux à seruir le Roy. Voila les eloges qu'ils méritent, & que ie leur donne. Mais cependant que mon esprit les admire, & que ma bouche ouuerte les loue, mon cœur iette des sospirs, & mes yeux respandent des larmes qui semblent s'opposer à ces illustres acclamations. Je ne sçauois attacher les plumes de leurs casques, ny les courroyes de leurs cuirasses, sans murmurer; ny leur pendre l'espée aux escharpes que ie leur ay données, sans fremir. J'ay peur que tu mesprise le soing que ie prends de leur vie, ou qu'ils traittent avec mesme fureur la tienne: ou que tous ensemble vous deueniez vos bourreaux, & mes ennemis. Que dois-je faire en ce funeste rencontre? mal-heureuse, feray ie des vœux pour ma patrie & pour mes freres? contre toy, ou pour toy, contre mes freres, & contre ma patrie.

Voy l'estat pitoyable où tu m'as reduitte? que ie ne sçauois implorer le Ciel contre le mal-heur qui me menasse sans l'irriter, contre le bon-heur qui me reste. Ainsi ie ne sçay si ie dois preparer des triumphes ou des funerailles au retour des vainqueurs, ou à la mort

des vaincus. Mon ame entre tous se trouue si esgallement parta-
gée, que ie ne sçay si ie dois me réioüir du salut des vns, ou me
plaindre de la perte des autres.

Considere cruel, l'amour que ie te porte & puis qu'il balance mes
affections, entre toy, mon sang, & ma patrie. C'est beaucoup,
quoy que tu puisse dire: & ma flamme est assez forte, de résister à
ces deux puissances. Je ne te prouue point cette verité par vn long
discours. C'est assez que tu sçaches toy-mesme que nous deuons
tout à nostre sang, & à nostre pais; & qu'il faut qu'en nos cœurs,
pout leur disputer l'auantage, la passion soit bien viue & bien vio-
lante.

Voy donc à present qui de nous merite mieux le titre d'infidelle.
Pour vne cause indigne & criminelle tu m'abandonne; & moy ie
ne te puis quitter pour vne cause legitime. Toutes choses pour
m'arracher de ton party me sollicitent. Quant ie voudrois t'oublier
& te haïr, i'ay trop d'excuse. Je ne reconnois plus en toy celuy que
i'aimay iadis. Peut-estre deuiendray ie inconstante si ie t'ayme en-
core. Mon amour changera d'obiet puis que tu change: & ce sera
me declarer insensée, que d'aymer vn furieux.

Quels reproches trop sensibles & trop iustes ne me feront point
mes freres & ma patrie, d'aymer vn ennemy qui ose les combattre,
& qui s'efforce à les faire perir. Vn ennemy si lasche, qu'il sert vn
Tyran sorty de la boüe & de la poussiere; & adore vne idole diuisée
comme vne veritable diuinité. Encore si ton crime estoit illustre, &
qu'il eust quelque ombre de raison, ie serois en quelque façon ex-
cusable par la passion qui me gouerne. Mais il est infame, & me
rends si criminelle, qu'on en met dedans la Bastille de bien plus in-
nocents que moy. Cependant, rien n'empesche mon ardeur d'e-
stre inuiolable. Je t'ayme, ingrat, tousiours tel que tu puisse estre:
& ne puis me resoudre à t'imiter. Je n'escoute point de voix qui te
condamne, sans qu'aussi-tost mon amour ne te iustifie: & si c'est moy
mesme qui t'attaque, moy-mesme ie te deffends aussi. Je me per-
suaide que tu es aueugle, de peur de te croire criminel: & quand ie
passe contre toy ce nom de crime, c'est vn terme de mon desespoir,
que ma raison plus saine des-auoüe aussi-tost qu'il est prononcé.

Reuiens donc cher suiet de mes douleurs & cause illustre de ma

flamme, confirmer en mon cœur les sentimens de ta vertu. Sors de l'obscurité qui t'environne & m'arrache de la nuit qui m'enuelope depuis ton départ. Viens icy effacer les mauuais sentimens qu'on peut auoir de ton courage, trop digne pour estre blasmé. Il n'y a point de honte à se desdire d'un dessein perfide, non plus qu'il n'y a point de gloire à faillir. Le remors d'un forfait est un mouuement illustre, qui souuent excuse la faute, & iustifie mesme le criminel. En cette occasion ton repantir te sera glorieux autant que ta faute fut condamnable : & ta patrie verra ton retour avec autant de ioye, que ton départ luy causa de tristesse.

Que rien donc ne t'arreste dauantage & ne te rauisse aux vœux de ton amant & de ta patrie ? ne pense pas qu'il y ait de sermens qui t'engagent de demeurer, & de nous trahir. Tu n'as peu iurer ny contre l'une ny contre l'autre, ny violer ta foy que nous tenons toutes deux, peux tu disposer de toy mesme, sans que nous y consentions ensemble. Puis que le deuoir & l'amour t'ont rendu nostre, reuiens donc encores vne fois & quitte un barbare qui ne doit plus attendre de toy que la guerre. Viens receuoir de ta main par la mienne les lauriers que ie prepare à tes victoires, & apres tes legitimes combats le pris que ie reserue à ta constance.